

摘藻堂四庫全書薈要

史部

欽定四庫全書叢要

史部
元史卷二百二十三

詳校官內閣侍讀孫球



欽定四庫全書薈要卷六千五百 史部

元史卷一百二十一

明翰林學士亞中大夫知制誥兼修國史宋濂等修

傳第八

蘇布特



蘇布特蒙古烏梁海人其先世獵於鄂諾河上遇敦巴該皇帝因相結納至太祖時已五世矣諾爾布者生布古圖衆目為哲勒默哲勒默者漢言有謀畧人也三世

孫和實衮生喀巴喀巴二子長哈勒琿次蘇布特俱驍
勇善騎射太祖在班珠爾河時喀巴嘗驅羣羊以進遇
盜被執哈勒琿與蘇布特繼至以槍刺之人馬皆倒餘
黨逸去遂免父難羊得達於行在所哈勒琿以百戶從
帝與奈曼部主戰於長城之南哈勒琿射却之其衆奔
庫楚坦山而潰蘇布特以質子事帝為百戶歲辛未攻
金桓州先登拔其城帝命賜金帛一車默爾奇斯部強
盛不附丙子帝會諸將於圖喇河之黑林問誰能為我

征默爾奇斯者蘇布特請行帝許之乃選裨將阿勒楚爾領百人先覘其虛實蘇布特繼進蘇布特戒阿勒楚爾曰汝止宿必載嬰兒具以行去則遺之若挈家而逃者默爾奇斯見之果以為逃者遂不為備己卯大軍至蟾河與默爾奇斯遇一戰而獲二將盡降其衆其部主輝圖奔欽察蘇布特追之與欽察戰于玉峪敗之壬午帝征回回國其主默呼委國而去命蘇布特與哲伯追之及于呼喇河哲伯戰不利蘇布特駐河東戒其衆人

燕三炬以張軍勢其王夜遁復命統兵萬人由布哈川
布勒噶爾城追之凡所經歷皆無水之地既度川先發
千人為游騎繼以大軍晝夜兼行比至默呼逃入海不
月餘病死盡獲其所棄珍寶以獻帝曰蘇布特枕干血
戰為我家宣勞朕甚嘉之賜以大珠銀罌癸未蘇布特
上奏請討欽察許之遂引兵繞袞騰吉斯海展轉至太
和嶺鑿石開道出其不意至則遇其酋長伊勒吉及塔
塔古爾方聚於布咱河縱兵奮擊其衆潰走夫及伊勒

吉之子逃於林間其奴來告而執之餘衆悉降遂收其境又至阿勒錦河與俄羅斯大小穆爾奇扎爾遇一戰降之畧阿蘇部而還欽察之奴來告其主者蘇布特縱為民還以聞帝曰奴不忠其主肯忠他人乎遂戮之又奏以默爾奇斯奈曼奇味杭津欽察諸部千戶通立一軍從之畧伊瑪里克和卓部獲馬萬匹以獻帝欲征河西以蘇布特在外久遣令歸省其親蘇布特奏願從西征帝命度大磧以往丙戌攻下薩里輝和爾塔勒齊木

等部及德順鎮戎蘭會洮河諸州得牝馬五千匹悉獻于朝丁亥聞太祖崩乃還己丑太宗即位以塔瑪噶公主妻之從攻潼關軍失利帝責之睿宗時在藩邸言兵家勝負不常請令立功自効遂命引兵從睿宗經理河南道出牛頭關遇金將哈達帥行騎數十萬待戰睿宗問以方略蘇布特曰城居之人不耐勞苦數挑以勞之戰乃可勝也師集三峯山金兵圍之數匝會風雪大作其士卒僵仆師乘之殺戮殆盡自是金軍不能復振壬

辰夏睿宗還駐官山留蘇布特統諸道兵圍汴癸巳金主渡河北走追敗之於黃龍岡斬首萬餘級金主復南走歸德府未幾復走蔡州汴降俘其后妃及寶器以獻進圍蔡州甲午蔡州破金主自焚死時汴梁受兵日久歲飢人相食蘇布特下令縱其民北渡以就食乙未太宗命諸王巴圖西征巴齊瑪克曰聞巴齊瑪克有膽勇蘇布特膽勇可勝之命為先鋒與巴齊瑪克戰繼又令統大軍遂虜巴齊瑪克妻子於袞騰吉斯海巴齊瑪克

聞蘇布特至大懼逃入海中辛丑太宗命諸王巴圖等討俄羅斯部主額勒本為其所敗圍托里實克城不克巴圖奏遣蘇布特督戰蘇布特選哈必齊軍齊哩克昆等五十人一戰獲額勒本進攻托里實克城三日克之盡取俄羅斯所部而還經哈扎爾山攻滿濟勒噶部主齊哩克蘇布特為先鋒與諸王巴圖錫里庫實保哈坦五道分進衆曰齊哩克軍勢盛未可輕進蘇布特出奇誘之至渾寧河諸王軍於上流水淺馬可涉中復有橋

下流水深蘇布特欲結棧潛渡繞出敵後未渡諸王先涉河與戰巴圖軍爭橋反為所乘沒甲士三十人并亡其麾下將巴哈台既渡諸王以敵尚衆欲要蘇布特還徐圖之蘇布特曰王欲歸自歸我不至塔納河瑪察克城不還也乃馳至瑪察克諸王亦至遂拔城而還諸王來會巴圖曰瀟寧河戰時蘇布特救遲殺我巴哈台蘇布特曰諸王惟知上流水淺且有橋遂渡而與戰不知我於下流結棧未成今但言我遲當思其故於是巴圖

亦悟後大會飲以馬乳及蒲萄酒言征齊哩克時事曰
當時所獲蘇布特功也是歲太宗崩癸卯諸王大會巴
圖欲不往蘇布特曰大王於族屬為兄安得不往甲辰
遂會於伊奇哩河丙午定宗即位既朝會還家于圖喇
河上戊申卒年七十三贈劾忠宣力佐命功臣開府儀
同三司上柱國追封河南王諡忠定于烏蘭哈達
烏蘭哈達初事太祖時憲宗為皇孫尚幼以烏蘭哈達世
為功臣家使護育之憲宗在潛邸遂分掌宿衛歲癸巳

領兵從定宗征大真國破萬努於遼東繼從諸王巴圖
征欽察及俄羅斯博羅爾諸部丙午又從巴圖討博羅
爾納琳穆蘇部平之戊申定宗崩巴圖與宗室大臣議
立憲宗事久未決四月諸王大會定宗皇后問所宜立
皆惶惑莫敢對烏蘭哈達對曰此議已先定矣不可復
變巴圖曰烏蘭哈達言是也議遂定憲宗即位之明年
世祖以皇弟總兵討西南夷烏蠻白蠻鬼蠻諸國以烏
蘭哈達總督軍事其鬼蠻即赤禿哥國也癸丑秋大軍

自旦當嶺入雲南境摩些二部酋長唆火脫因塔裏馬
來迎降遂至金沙江烏蘭哈達分兵入察罕章蓋白蠻
也所在寨柵以次攻下之獨阿塔刺所居半空和寨依
山枕江牢不可拔使人覘之言當先絕其汲道烏蘭哈
達率精銳立砲攻之阿塔刺遣人來拒烏蘭哈達遣其
子阿珠迎擊之寨兵退走遂并其弟阿叔城俱拔之進
師取龍首關翊世祖入大理國城甲寅秋復分兵取附
都善闡轉攻合刺章水城屠之合刺章蓋烏蠻也前次

羅部府大酋高昇集諸部兵拒戰大破之於浹可浪山下遂進至烏蠻所都押赤城城際滇池三面皆水既險且堅選驍勇以砲摧其北門縱火攻之皆不克乃大震鼓鉦進而作作而止使不知所為如是者七日伺其困乏夜五鼓遣其子阿珠潛師躍入亂斫之遂大潰至昆澤擒其國王段智興及其渠帥馬合刺昔以獻其餘衆依阻山谷者分命裨將伊埒圖卜新掩其右哈達護尉掩其左約三日捲而內向及圍合與阿珠引善射者二

百騎期以三日四面進擊烏蘭哈達陷陣鏖戰又攻織寨拔之至乾德哥城烏蘭哈達病委軍事於阿珠環城立砲以草填塹衆軍始集阿珠已率所部搏戰城上城遂破乙卯攻不花合因阿合阿因等城阿珠先登取其三城又攻赤禿哥山寨阿珠緣嶺而戰遂拔之乘勝擊破魯廝國塔渾城又攻取忽蘭城魯廝國大懼請降阿伯國有兵四萬不降阿珠攻之入其城舉國請降復攻阿魯山寨進攻阿魯城克之乃搜捕未降者遇赤禿哥

軍於合打台山追赴臨崖盡殺之自出師至此凡二年
平大理五城八府四郡洎烏白等蠻三十七部兵威所
加無不款附丙辰征白蠻國波麗國阿珠生擒其驍將
獻俘闕下詔以便宜取道與托克岱爾兵合遂出烏蒙
趨瀘江剗禿刺蠻三城却宋將張都統兵三萬奪其船
二百艘於馬湖江斬獲不可勝計遂通道於嘉定重慶
抵合州濟蜀江與托克岱爾會丁巳以雲南平遣使獻
捷於朝且請依漢故事以西南夷悉為郡縣從之賜其

軍銀五千兩綵幣二萬四千匹授銀印加大元帥還鎮
大理遂經六盤山至臨洮府與大營合月餘復西征烏
蠻秋九月遣使招降交趾不報冬十月進兵壓境其國
主陳日熒隔江列象騎步卒甚盛烏蘭哈達分軍為三
隊濟江齊齊克圖從下流先濟大帥居中駙馬輝圖與
阿珠在後仍授齊齊克圖方畧曰軍既濟勿與之戰彼
必來逆駙馬斷其後汝伺便奪其船蠻潰走至江無船
必為我擒矣師既登岸即縱與戰齊齊克圖違命蠻雖

大敗得駕舟逸去烏蘭哈達怒曰先鋒違我節度軍有
常刑齊齊克圖懼飲藥死烏蘭哈達入交趾為久駐計
軍令嚴肅秋毫無犯越七日日暎請內附於是置酒大
饗軍士還軍柙赤城戊午引兵入宋境其地炎瘴軍士
皆病遇敵少却亡軍士四人阿珠還戰擒其卒十二人
其援復至阿珠以三十騎阿穆爾圖繼以五十騎擊走
之時烏蘭哈達病將旋師阿珠戰馬五十疋夜為秃刺
蠻所掠入告烏蘭哈達曰吾馬盡為盜掠去將何以行

即分軍搜訪知有三寨藏馬山顛阿珠親率將士攀崖而上破其諸寨生擒賊酋盡得前後所盜馬千七百匹乃屠柙赤城憲宗遣使諭旨約明年正月會軍長沙乃率四王騎兵三千蠻熨萬人破橫山寨關老蒼關徇宋內地宋陳兵六萬以俟遣阿珠與四王潛自間道衝其中堅大敗之盡殺其衆乘勝擊逐躡貴州蹀象州入靜江府連破辰沅二州直抵潭州城下潭州出兵二十萬斷我歸路烏蘭哈達遣阿珠與塔納伊嚕音特穆爾軍

其前而自與四王軍其後來擊破之自入敵境轉鬪千里未嘗敗北大小十三戰殺宋兵四十餘萬擒其將大小三人其州又遣兵來攻追至門濠掩溺殆盡乃不敢復出壁城下月餘時世祖已渡江駐鄂州遣伊埒蒙古領兵二千人來援且加勞問遂自鄂州之澣黃洲北渡與大軍合庚申世祖即位夏四月烏蘭哈達至上都後十二年卒年七十二子阿珠自有傳

阿勒楚爾

阿勒楚爾永古特氏其先居雲中父達袞為金羣牧使歲辛未驅所牧馬來歸太祖命仍其官阿勒楚爾幼鞠于外祖兆齋家訛言為趙家因姓趙氏年十四隸皇子察罕台部嘗從獵射獲數麋有二虎突出射之皆死由是以善射名皇子深器愛之己卯太祖西征塔實干阿里瑪圖等國以功為千戶丁亥從征積石州先登拔其城圍河州斬首四十級破臨洮攻德順斬首百餘級攻鞏昌駐兵秦州太宗立尊察罕台為皇兄以阿勒楚

爾為元帥戊子鎮刪丹州自燉煌置驛抵玉關通西域
從定關隴辛卯從圍鳳翔阿勒楚爾分兵攻西南隅城
上礮石亂下選死士先登拔之斬金將劉興格分兵攻
西和州宋將彊俊衆數萬堅壁清野以老我師阿勒楚
爾率死士罵城下挑戰俊怒悉衆出阿勒楚爾佯走俊
追之因以奇兵奪其城伏兵要其歸轉戰數十里斬首數
千級擒俊餘衆退保仇池進擊拔之從拔平涼慶陽邠
原寧皆降涇州復叛殺守將郭元恕衆議屠之阿勒楚

爾但誅首惡師還原州降民棄老幼走衆曰此必反也
宜誅之以警其餘阿勒楚爾曰此輩懼吾驅之北徙耳
遣人諭之曰汝等若走以軍法治罪父母妻子併誅矣
汝歸保無他明年草青具牛酒迎師於此州民皆復歸
豪民陳苟集數千人潛新寨諸洞衆議以火攻之阿勒楚
爾曰招諭不出攻之未晚偕數騎抵寨縱馬解弓矢召
苟遙語折矢與為誓苟即相呼羅拜謝更生之恩皆降
金人守潼關攻之戰於扇車回不克睿宗由山南入

金境阿勒楚爾為先鋒趣散關宋人已燒絕棧道復由
兩當縣出魚關軍沔州宋制置使桂如淵守興元阿勒
楚爾假道於如淵曰宋讐金久矣何不從我兵鋒一洗
國恥今欲假道南鄭由金洋達唐鄧會大兵以滅金豈
獨為吾之利亦宋之利也如淵度我軍壓境勢不徒還
遂遣人導我師由武林關東抵鄧州西破小關金人大
駭謂我軍自天而下其平章完顏哈達樞密使伊喇布
哈帥十七都尉兵數十萬相拒于鄧我師不與戰直趣

鈞州與親王阿齊台等兵合陣三峯山下會天大雪金
兵成列阿勒楚爾率所部精兵迎擊於前諸軍乘之金
師敗績癸巳金主奔蔡十二月從圍蔡甲午金亡初金
將郭斌自鳳翔突圍出保金蘭定會四州至是命阿勒
楚爾往取之圍斌于會州食盡將走敗之于城門兵入
城巷戰死傷甚衆斌手劔驅妻子聚一室焚之已而自
投火中有女奴自火中抱兒出泣授人曰將軍盡忠忍
使絕嗣此其兒也幸哀而收之言畢復赴火死阿勒楚

爾命保其孤遂定四州金將汪世顯守鞏州皇子奎騰圍之未下遣阿勒楚爾等往招之世顯率衆來降皇子嘉其材勇賞賚甚厚賜名巴圖爾拜征行大元帥丙申大軍伐蜀皇子出大散關分兵令宗王穆濟等出陰平郡期會于成都阿勒楚爾領砲手兵為先鋒破宕昌畧階州攻文州守將劉祿數月不下謀知城中無井乃奪其汲道率勇士梯城先登殺守陴者數十人遂拔其城祿死之因招徠吐蕃酋長康托莽嘉等十族皆賜以銀

符畧定龍州遂與大散軍合進克成都師還成都復叛
丁酉阿勒楚爾言於宗王曰隴西州縣方平人心猶貳
漢陽當隴蜀之衝宋及吐蕃利於入寇宜得良將以鎮
之宗王曰安反側制寇賊上策也然無以易汝遂分蒙
古千戶五人隸麾下以往阿勒楚爾命侯和尚南成沔
州之石門珠嚕西成階州之兩水謹斥堠嚴巡邏西南
諸州不敢犯戊戌從元帥塔爾海率諸翼兵伐蜀克隆
慶己亥攻重慶庚子圍萬州宋人將舟師數百艘逆流

迎戰阿勒楚爾順流率勁兵乘巨筏浮草舟於其間矢
雨射宋人不能敵敗諸夔門辛丑伐四川破二十餘城
成都守將田顯開北門以納師宋制置使陳隆之出奔
追獲之縛至漢州令誘降守將王夔夔不降進兵攻之
夔夜驅火牛突圍出奔遂斬隆之壬寅會大軍破遂寧
瀘敘等州癸卯破資州庚戌阿勒楚爾安輯涇邠二州
宋制置余玠攻興元文州降將王德新乘隙自階州叛
執扈牛二鎮將領衆千餘走江油憲宗召阿勒楚爾還

舊鎮阿勒楚爾遣將擣江油奪扈牛歸中統元年世祖

即位親王有異謀者其將阿勒達爾琿塔哈圖據闕隴

時阿勒楚爾以老委軍於其子帝遣宗王哈坦哈必齊

阿哈瑪特西討阿勒楚爾曰內難方殷豈臣子安卧之

時耶吾雖老尚能破賊遂引兵出刪丹之耀碑谷從阿

哈瑪特與之合戰會大風晝晦戰至晡大敗之斬馘

無算阿勒楚爾與總帥汪良臣斬阿勒達爾琿塔哈等

捷聞帝錫璽書褒美賜弓矢錦衣四年卒年六十九延

祐元年贈推忠佐運功臣太保儀同三司上柱國封秦國公諡武宣子十人徹爾國寶最知名徹爾襲職為元帥丁巳從父攻瀘州降宋將劉整宋將姚德壁雲頂山戊午大軍圍之徹爾率部兵由水門先登破其壁德降後以病廢卒國寶一名赫色勒少擊劍學書侗儻好義有謀畧父為元帥軍務悉以委之所至多捷從攻重慶降宋都統張實併掠合州以歸中統元年從攻阿勒達爾有功阿勒達爾叛將輝圖據吐蕃之達實嶺國寶攝

帥事討之衆欲速戰國寶曰此窮寇也宜少緩以計破之遂以精兵襲其後輝圖欲西走國寶據險要之挑戰則斂兵自固相持兩月潛兵出其不意擒殺之捷聞賜弓矢金綺初阿勒楚爾告老制命徹爾襲征行元帥徹爾以病不視事國寶乃謂諸弟曰昔我先人耀兵西陲大功既集闕隴雖寧而西戎未靖此吾輩立功之秋也乃遣謝昂與弟國能持金帛說降吐蕃酋長康托莽嘉從國寶入覲國寶奏曰文州山川險阨控庸蜀拒吐蕃

宜城文州屯兵鎮之從之授國寶三品印為蒙古漢軍
元帥兼文州吐蕃萬戶府達嚕噶齊與康托莽嘉皆賜
金符時扶州諸羌未附國寶宣上威德於是科爾戩巴
爾嘉諸酋長皆歸款從國寶入覲國寶圖山川形勢以
獻詔授科爾戩巴爾嘉為萬戶賜金虎符諸酋長為千
戶皆賜金符賜國寶金幣國寶治文州有善政至元四
年卒延祐元年贈推誠佐理功臣光祿大夫平章政事
柱國封梁國公諡忠定子世榮世延初國寶將卒以世

榮幼命弟國安襲其職國安既襲蒙古漢軍元帥兼文

州吐蕃萬戶府達嚕噶齊後以其兄國寶安邊功賜金

虎符進昭勇大將軍十五年討叛王圖嚕于六盤獲之

請解職授世榮帝曰人爭而汝讓可以敦薄俗錄其六

盤功進昭毅大將軍招討使世榮襲懷遠大將軍蒙古

漢軍元帥兼文州吐蕃萬戶府達嚕噶齊後以功進安

遠大將軍吐蕃宣慰使議事都元帥佩三珠虎符世延

中書平章政事

鄂約達勒

鄂約達勒莽果人其先琳沁巴圖爾有二子次名蒙果
勒始別為莽果氏鄂約達勒其六世孫也與兄烏頁俱
事太祖時代酬強盛烏頁率其屬歸之鄂約達勒止之
不聽追之不肯還鄂約達勒乃還太祖曰汝兄既去汝
獨留此何為鄂約達勒無以自明取矢折而誓曰所不
終事主者有如此矢太祖察其誠更名為色辰約為諳
達色辰者聰明之謂也諳達者左右輔翊之謂也太祖

與克呼王汗對陳於哈喇沁師少不敵帝命烏嚕一軍
先發其將卓沁台橫鞭馬鬣不應鄂約達勒奮然曰我
猶鑿諸君猶斧鑿匪斧不入我請先入諸軍繼之萬一
不還有三黃頭兒在唯上念之遂先出陷陣大敗之至
晡時猶追逐不已敕使止之乃還腦中流矢創甚帝親
傅以善藥留處帳中月餘卒帝深惜之王汗滅帝以其
將濟勒濟沙抗鄂約達勒乃分濟勒濟沙民百戶隸其
子且使世世歲賜不絕仍令收完莽果人民之散亡者

太宗思其功復以北方萬戶封其子孟克為郡王歲丙申呼圖克汰料漢民分城邑以封功臣授孟克泰安州民萬戶帝訝其少呼圖克對曰臣今差次惟視舊數多寡孟克舊纔八百戶帝曰不然鄂約達勒封戶雖少戰功多其增封為二萬戶與十功臣同為諸侯者封戶皆異其籍烏嚕爭曰孟克舊兵不及臣之半今封顧多於臣帝曰汝忘而先橫鞭馬鬣時耶烏嚕遂不敢言孟克卒孫珠爾噶岱奇塔特魯斯呼圖克烏納和囉噶齊俱

襲封為郡王

博爾歡

巴圖

博爾歡鄂約達勒幼子察木哈克孫蘇嚕克圖子也時諸侯王及十功臣各有斷事官博爾歡年十六為本部斷事官從世祖討額呼布格數有功帝喜而賜馬四十匹金幣稱之中統三年李璫叛命帥莽果一軍圍濟南分兵掠益都萊州悉平之詔錄燕南獄讞決明允賜衣一襲皇子雲南王和克齊為省臣保赫昂毒死事覺中

書擇可治其獄者四人奏上皆不稱旨丞相錫津以博爾歡聞帝可其奏博爾歡辭曰臣不敢愛死第年少不知書恐誤事耳帝乃以吏部尚書拜特穆爾輔其行未至雲南保赫昂密以金六篋迎餽祈勿究其事博爾歡慮其握兵徼外拒之恐致變陽諾曰吾橐不能容可且持歸待我取之博爾歡至則竟其獄誅毒王者而歸其金于省陞見帝顧謂錫津曰卿舉得其人矣賜黃金五十兩詔莽果事無大小悉統於博爾歡授昭勇大將軍

右衛親軍都指揮使大都則專右衛上都則兼三衛會
伐宋授金吾衛上將軍中書右丞詔分大軍為二右軍
受巴延阿珠節度左軍受博爾歡節度俄兼淮東都元
帥罷山東經畧司而以其軍悉隸焉遂軍于下邳召將
佐謀曰清河城小而固與昭信淮安泗州為犄角猝未
易拔海州東海石秋遠在數百里之外必不嚴備吾頓
大兵為疑兵以輕騎倍道襲之其守將可擒也師至三
城果皆下清河亦降宋主以國內附而淮東諸城猶為

之守詔博爾歡進軍拔淮安南堡戰白馬湖及寶應掠
高郵自西小河入漕河援灣頭斷通泰援兵遂下揚州
淮東平益封桂陽德慶二萬一千戶至元十四年討平
叛臣珠爾噶岱於德昌賜玉帶文綺與博羅同署樞密
院事拜中書右丞行省北京未幾召還時江南新附多
反側詔募民能從大軍進討者使自為一軍聽節度於
其長而毋役於他軍制命符節皆與正同會博爾歡寢
疾乃附樞密董文忠奏曰今疆土寢廣勝兵百萬指揮

可集何假此無藉之徒彼一踐南土則掠人貨財俘人妻孥仇怨益滋而叛者將愈衆矣奏上召輿疾賜坐與語帝大悟遂可其奏而常德入訴唐古一軍殘暴其境敕斬以徇凡所募軍皆罷十六年以海拉蘇布爾噶蘇鄂喇昆諸部不相統命博爾歡監之十八年以中書右丞行省甘肅二十年拜御史大夫行御史臺事以疾歸諸王納延叛帝將親征博爾歡諫曰昔太祖分封東諸侯其地與戶臣皆知之以二十為率納延得其九莽果

烏嚕扎拉爾鴻吉哩伊奇喇斯五諸侯得其十一惟徵
五諸侯兵自足當之何至上煩乘輿哉臣疾且愈請事
東征帝乃賜鎧甲弓矢鞍勒命督五諸侯兵與納延戰
敗之其黨塔布岱以兵來拒會久雨軍乏食諸將欲退
博爾歡曰今兩陣相對豈容先動俄塔布岱引兵退博
爾歡以其師乘之轉戰二日身中三矢大破之斬其駙
馬和擒適大師伊嚕諾延大軍來會遂平納延擒塔布
岱既而其黨哈坦復叛詔與諸侯王奈瑪台討之哈坦

游騎猝至博爾歡從三騎返走抵絕澗可二丈許追騎垂及博爾歡策其馬一躍而過三從騎皆没人以為有神助云哈坦死斬其子羅丹於陳往返凡四歲凱旋俘哈坦二妃以獻敕以一賜奈瑪台一賜博爾歡陳其金銀器於延春閣上召諸侯三將帥分賜之博爾歡辭帝曰卿可謂能讓賜金銀器五百兩以旌之授河南宣慰改行中書省拜平章政事有詔括馬毋及勲臣之家博爾歡曰吾馬成羣所治地方三千里不先出馬何以為

吏民之倡乃先入善馬十有八汴南諸州莽為巨浸博爾歡躬行決口督有司繕完之三十二年成宗立遷陝西行中書省平章政事未行留鎮河南入朝請以泰安州所入五戶絲四千斤易內庫繒帛分給莽果一軍帝為敕遞車送軍中賜以銀百五十兩陞辭帝諭之曰卿今白鬚世祖德言寔多聞之宜加慎護因以世祖所佩弓矢鞶帶賜之有頃近臣奏伐宋時右軍分屬巴延阿珠左軍分屬博爾歡今巴延阿珠皆受分地而博爾歡

未及惟帝裁之帝曰何久不言豈彼恥自請耶乃益封高郵百戶大德元年叛王永和爾烏魯斯布哈來歸博爾歡聞之特遣使馳奏曰諸王之叛皆由其父此輩幼弱無所與知今茲來歸宜棄其前惡以勸未至帝深以為然賜金鞍勒命以平章政事行省湖廣會并福建行省入江浙拜光祿大夫上柱國江浙等處行中書省平章政事居歲餘卒年六十三博爾歡勇有智畧戰常以身先之所獲財物悉與將士故得其死力平居常以國

事為憂聞變即請行至終其事乃止其忠義蓋天性然也累贈推忠宣力贊運功臣太師開府儀同三司上柱國加封奉安王諡武穆子昆都巴圖額森特穆爾博囉昆都山東宣慰使遥授中書平章政事額森特穆爾河南江北等處行中書省左丞相卒官開府儀同三司翰林學士承旨博囉陝西等處行中書省平章政事額森特穆爾子尼瑪僧格襲郡王伊實嘉勒幹僧格中政使巴圖幼穎異不以家世自矜長嗜書史大德五年擢江

東道廉訪副使拜江南行臺侍御史未幾召入僉樞密院事領實喇卜沁至大二年出為江南行臺御史中丞遷陝西行臺御史大夫延祐元年拜甘肅行省平章政事時米價騰湧陸輓每石費二百緡乃為經畫計所省至四百餘萬緡自是諸倉俱充溢甘州氣寒地瘠少稔歲民饑則發粟賑之春闕種則貸之於是兵饟既足民食亦給詔賜名鷹甲冑弓矢及鈔五千緡以勞焉四年移江浙行省平章政事入為太子賓客上書陳古先聖

王正心修身之道帝嘉納之遷江南行臺御史大夫皇
太后謂東宮官不宜使外止其行遂以疾辭去寓居高
郵英宗即位復命為江南行臺御史大夫陞見以疾固
辭帝慰諭久之命以平章之祿歸養于家復賜鈔十萬
緡所服藥須空青詔遣使江南訪求之已圖辭謝曰臣
曩膺重寄深懼弗稱今已病廢況敢叨濫厚祿以受重
賜乎併以所給平章政事祿歸有司泰定元年還京師
卒朝廷知其貧賻鈔二萬五千貫御史臺奏賻三萬五

千貫仍還所辭祿妻鴻吉哩氏弗受曰始巴圖仕于朝不敢虛受廩祿今歿矣苟受是祿非其意也卒辭之子多爾濟將作院判官

察蘇

察蘇奈曼部人又號曰達魯其先迪延汗為奈曼部主祖庫楚類父察罕太祖舉兵討不庭庫楚類失其部落察罕奔契丹卒察蘇尚幼與其母間行來歸太祖奉中宮旨侍宮掖察蘇年二十五即從征伐破代石二州不

避矢石每先登馬鴈門之戰屢捷會太宗命睿宗平金
察蘇執銳以從與金兵戰所向無前壬辰兵次鈞州金
兵壘于三峯山察蘇察其營壁不堅夜領精騎襲之金
兵驚擾遂乘擊之拔三峯山睿宗以察蘇功聞于朝有
旨以湯陰縣黃招撫等一百一十七戶賜之察蘇力辭
不受復賜以男女五十口宅一區黃金鞞帶酒壺盃盃
各一辭弗許迺受之制受萬戶與內侍呼圖克魯沁僉
起西京等處軍人征行及鎮守隨州招集民戶每千人

以官一員領之丁酉秋七月奉旨調軍得西京大名賓
棣懷孟真定河間邢洺磁威新衛保等府州軍四千六
十餘人統之後移鎮潁以疾歸大名歲戊申正月卒年
四十四子布敦

布敦之在襁褓時父察蘇方領兵平金與其祖母喀喇
氏在三皇子宫庭戊申父察蘇卒母張氏乃迎布敦以
歸祖母喀喇氏卒張嘗從容訓之曰人有三成人知恐
懼成人知羞恥成人知艱難成人否則禽獸而已布敦

受母教唯謹甲寅世祖以宗王鎮黑水有旨諭察罕諾
延命布敦襲察蘇職為副萬戶鎮守隨頰等處丙辰冬
十有二月世祖復諭征鎮軍士悉聽布敦等號令布敦
狀甚偉身長七尺餘肩豐多力善刀舞尤精騎射士卒
咸畏服之明年庚申世祖即位委任尤專癸亥正月召
赴行在所冬十一月謁見世祖於行在所世祖賜以金
符命布敦為隨頰二州屯田府達嚕噶齊時二州地多
荒蕪有虎食民之妻其夫來告布敦默然良久曰此易

治耳迺立檻設機縛羔羊檻中以誘虎夜半虎果至機發虎墮檻中因取射之虎遂死自是虎害頓息至元十三年授明威將軍信陽府達嚕噶齊佩金符時信陽亦多虎布敦至任未久一日以馬褻置鞍上出獵命左右燔山虎方出走布敦以褻擲虎虎搏褻據地而吼布敦旋馬視虎抽矢射之虎殪十六年進宣威將軍常德路副達嚕噶齊會同李明秀作亂布敦請以單騎往招之直抵賊壘賊輕之竟不設備布敦至諭以朝廷恩德

使速為自新計明秀素畏服遂與俱來布敦聞于朝明
秀伏誅賊遂平三十一年進懷遠大將軍遷池州路達
嚕噶齊之官道經潁上潁近荆山有野豕時出沒害民
禾稼民苦莫能制聞布敦至迎拜境上告以其故布敦
曰毋慮也遂至荆山以狼牙箭射之豕走數里大德十
三年進昭勇大將軍台州路達嚕噶齊卒年八十一子
布哈僉嶺南廣西道肅政廉訪司事文圭有隱德贈秘
書監著作郎延壽湯陰縣達嚕噶齊孫守恭曾孫與權

皆讀書登進士科人多稱之

元史卷一百二十一

元史卷一百二十一考證

蘇布特傳歲辛未攻金桓州先登拔其城 辛未原文
作壬申按壬申為太祖七年金衛紹王崇慶元年也
宋元通鑑載元兵破金昌桓撫三州在大安三年是
年為辛未核之金史亦同今據改

是歲太宗崩 是歲原文作壬寅按太宗在位十三年
崩年為辛丑傳誤今改正

烏蘭哈達傳歲癸巳領兵從定宗征大真國破萬努於

遼東 癸巳原文作乙巳按萬努之擒在太宗五年
是為癸巳歲見本紀及宋元通鑑此作乙巳相去計
十三載舛甚又大真原文作女真按萬努於太祖十
年據遼東僭國號曰大真至十一年降既而復叛僭
稱東夏亦詳本紀今據改

博羅爾 原文作孛烈兒他卷同繼從諸王句孛烈兒
上行阿字與下文孛烈兒似兩部今從刪

戊申定宗崩 原文作己酉按憲宗於辛亥歲即位前

此已酉庚戌兩年國中虛位不得以已酉屬之定宗也今改正

大酋高昇 按本紀作高祥志作高泰祥互異

魯廝國大懼 原文魯字上又衍一魯字從上文刪

阿勒楚爾傳已卯太祖西征塔實干 已卯原文作甲戌據本紀改

皇子嘉其材勇 原文作皇兄考諸王表太宗之兄卓齊爾察罕台二人是時並未在行間當從上文皇子

庫騰改子為是至庫騰雖持節專征其賜號及拜授
元帥自當請命朝廷並於賜名上增太宗二字為合
隴西州縣方平 原文西字誤入於人心猶貳句下今
按文義改正

癸卯破資州 原文作癸亥按續通鑑蒙古兵入蜀在
宋理宗淳祐三年乃蒙古太宗六皇后稱制之二年
也是歲為癸卯傳作癸亥不特與通鑑本紀不符即
干支亦不合

博爾歡傳至元十四年 按上文祇稱中統三年十四
年上當增至元二字與紀年之例方合

授河南宣慰 原文脫授字前後官階不明今增

布敦傳以為隨顏二州屯田府達嚕噶齊 隨顏原文

作壽顏按納顏金臺集有達魯特將軍射虎詩蓋謂
布敦也序稱其由隨顏萬戶出守信陽今據改

欽定四庫全書蒼要卷六千五百一 史部

元史卷一百二十二

明翰林學士亞中大夫知制誥兼修國史宋濂等修

列傳第九

巴哩珠阿勒坦德濟

巴哩珠阿勒坦德濟伊都呼伊都呼者高昌國主號也
先世居輝和爾之地有和林山二水出焉曰圖喇刺曰
索隆噶一夕有神光降於樹在兩河之間人即其所而

候之樹乃生瘰若懷妊狀自是光常見越九月又十日而樹瘰裂得嬰兒者五土人收養之其最稚者曰布克汗既壯遂能有其民人土田而為之君長傳三十餘君是為伊嚕勒德濟數與唐人相攻戰久之議和親以息民罷兵於是唐以金蓮公主妻伊嚕勒德濟之子格呼勒德濟居和林伯哩伯哩特言婦所居山也又有山曰騰格哩哈達言天靈山也南有石山曰呼圖哩哈達言福山也唐使與相地者至其國曰和林之盛彊以有此

山也盍壞其山以弱其國乃告諸伊嚕勒德濟曰既為
婚姻將有求於爾其與之乎福山之石於上國無所用
而唐人願見伊嚕勒德濟遂與之石大不能動唐人以
烈火焚之沃以醲醋其石碎乃輦而去國中鳥獸為之
悲號後七日伊嚕勒德濟卒災異屢見民弗安居傳位
者又數亡乃遷於交州交州即火州也統巴實伯里之
地北至阿珠河南接酒泉東至鄂端哈錫哈西臨西番
居是者九百七十餘載而至巴哩珠阿勒坦德濟臣於

契丹歲己巳聞太祖興朔方遂殺契丹所置監國等官

欲來附未行帝遣使使其國伊都呼大喜即遣使入奏

曰臣聞皇帝威德即棄契丹舊好方將通誠不自意天

使降臨下國自今而後願率部衆為臣僕是時帝征廸

延汗射其子托克托殺之托克托之子達都齊拉袞滿

濟勒噶圖色實四人以不能歸全屍遂取其頭涉雅爾

達實河將奔伊都呼先遣使往伊都呼殺之四人者至

與大戰於檐河伊都呼遣其國相來報帝復遣使還諭

伊都呼遂以金寶入貢辛未朝帝於吉魯爾河奏曰陛下若恩顧臣使臣得與陛下四子之末庶幾竭其犬馬之力帝感其言使尚公主伊埒鄂端且得序於諸子與哲伯納延征哈瑪爾蘇爾坦回回諸國將部曲萬人以先紀律嚴明所向克捷又從帝征尼沙布爾征河西皆有大功既卒而次子諤古埒濟德濟嗣諤古埒濟德濟卒子茂穆爾德濟嗣將探馬軍萬人從憲宗伐宋合州攻釣魚山有功還火州卒至元三年世祖命其子和爾

齊哈喇德濟嗣為伊都呼海都特們德爾之亂輝和爾之民遭亂解散於是有旨命伊都呼收而撫之其民人在宗王近戚之境者悉遣還其部輝和爾之衆復輯十二年都勒幹布斯必等率兵十二萬圍火州聲言曰阿濟格鄂囉齊諸王以三十萬之衆猶不能抗我而自潰爾敢以孤城當吾鋒乎伊都呼曰吾聞忠臣不事二主吾生以此城為家死以此城為墓終不能從爾也受圍凡六月不解都勒幹以書繫矢射城中曰我亦太祖皇

帝諸孫何以不附我且爾祖嘗尚公主矣爾能以女與我我則休兵不然則急攻爾其民相與言曰城中食且盡力已困都勒斡攻不止則相與俱亡矣伊都呼曰吾豈惜一女而不以救民命乎然吾終不能與之相見以其女伊埒伊克默色必濟厚載以茵引繩絕城下而與之都勒斡解去其後入朝帝嘉其功錫以重賞妻以公主曰巴克巴噶爾定宗之女也又賜鈔十萬錠以賑其民還鎮火州屯於州南哈密之地兵力尚寡北方軍忽

至其地大戰力盡遂死之子納琳德濟尚幼詣闕請兵

北征以復父讎帝壯其志賜金幣巨萬妻以公主曰布

爾罕太宗之孫女也公主薨又尚其妹曰巴拜徹爾有

旨師出河西俟北征諸軍齊發遂留永昌會吐蕃圖沙

瑪作亂詔以榮祿大夫平章政事領本部探馬等軍萬

人鎮吐蕃宣慰司威德明信賊用斂迹其民賴以安武

宗詔還嗣為伊都呼賜之金印復署其部押西護司之

官仁宗始稽故實封為高昌王別以金印賜之設王傅

之官其王印行諸內郡伊都呼印行諸輝和爾之境巴
拜徹爾公主薨復尚公主曰烏拉戩安西王之女也領
兵火州復立輝和爾城池延祐五年薨子二人長曰特
穆爾布哈次曰齊竒皆巴拜徹爾公主所生也特穆爾
布哈大德中尚公主曰多爾濟斯滿庫騰太子孫女也
至大中從父入覲備宿衛又事皇太后於東朝拜中奉
大夫領大都護事又以資善大夫出為鞏昌等處都總
帥達嚕噶齊奔父喪於永昌請以王爵讓其叔父竒徹

台叔父力辭乃嗣為伊都呼高昌王至治中領甘肅諸
軍仍治其部泰定中召還與威順王庫春布哈宣靖王
邁努靖安王扣布哈分鎮襄陽俄拜開府儀同三司湖
廣行省平章政事文宗召至京師佐平大難時湖廣左
丞有以忌嫉害政者詔命誅之特穆爾布哈乃為申請
曰是誠有罪然不至死人服其雅量天歷元年拜開府
儀同三司上柱國錄軍國重事知樞密院事明年正月
以舊官勲封拜中書左丞相三月加太子詹事十月拜

御史大夫其弟齊吉乃以讓嗣為伊都呼高昌王

特默齊

呼圖克特穆爾

塔爾海

特默齊赫呀氏善騎射初事呼蘭皇后帳前嘗命為摠馬官從太祖定西夏又從皇子奎春呼圖克行省特默塔拉定河南累有戰功憲宗之伐宋也世祖以皇弟受命攻鄂大駕征西川遣元帥烏蘭哈達自交趾擣宋與諸軍合歲己未皇弟駐兵鄂渚聞烏蘭哈達由廣西至長沙遣特默齊將練卒千人鐵騎三千迎烏蘭哈達於

鄂州烏蘭哈達得援抵江夏北涉黃州特默齊與有力
馬世祖即位命從征叛王於實默圖之地勞績益著至
元七年授蒙古諸萬戶府鄂囉總管十九年以疾卒子
八人呼圖克特穆爾最顯

呼圖克特穆爾好讀書與學士大夫遊字之曰漢卿仁
宗嘗顧左右曰呼圖克特穆爾字漢卿漢名卿不讓也
汝等以漢卿名之宜矣其母姓劉氏故人又稱之曰劉
漢卿云至元十一年從丞相巴延渡江既取宋遣視宋

故宮室護帑藏諭下明越等州從平章鄂囉入覲授忠
顯校尉總把再轉昭信校尉二十二年授奉訓大夫荆
湖占城等處行中書省理問官時行省之名曰荆湖占
城曰荆湖曰湖廣凡三改理問一日以軍事入奏數陳
辨白有指趣世祖大悅若曰辭簡意明令人樂於聽受
昔以其兄阿里警敏捷給令侍左右斯人顧不勝耶勅
都護托音納爾志之平章政事程鵬飛建議征日本奏
漢卿為征東省郎中帝顧托音納爾若曰鵬飛南士也

猶知其能姑聽之候還朕自錄任征東省罷徵漢卿還丞相阿爾哈雅以湖廣行省機密事重舍漢卿無可用者遣郎中伊嚕伊納克奏留從之二十一年從皇子鎮南王征交趾比還鄂時權臣方擅威福遂退處於家二十八年詔太傅右丞相順德王達爾罕擒權姦於鄂達爾罕遂拜湖廣行中書省平章政事詢舊人知方面之務者衆薦漢卿遣使即南陽家居驛致武昌奏事京師帝嘉之擢給事中居再歲提刑按察司改肅政廉訪司

臺臣奏授奉議大夫廣西海北道副使陞辭留之仍舊
職既而湖廣行省平章政事劉傑奏伐交趾造戰舡五
百於廣東帝曰此重事也須才幹臣乃濟用以漢卿督
匠南方勅曰汝還當顯汝於衆因頓首謝事既集帝崩
遷福建行省郎中朝列大夫漢陽監府中順大夫湖南
宣慰副使峒酋岑雄叛奉詔開諭頑獷帖服改太中大
夫河南行中書省郎中通議大夫同僉樞密院事拜禮
部尚書大臣奏覈實江南民田漢卿奉詔使江西以田

額舊定重擾民不便置不問止奏茶漕置局十有七所以七品印章敕授局官五十一員增中統課緡五十萬轉正議大夫兵部尚書未幾命為中奉大夫荆湖北道宣慰使已命復留之延祐三年大臣以浙東倭奴商舶貿易致亂奏遣漢卿宣慰閩浙撫戢兵民海陸為之靜謐云從子塔爾海

塔爾海漢卿兄子也世祖時從托克托呼充哈喇齊至元二十四年扈駕征納延二十六年入覲帝命充博囉

齊扈駕至和林賜濟遜冠服大德四年授中書直省舍
人遷中書客省副使武宗即位賜中統鈔五百錠以旌
其能尋進和林行省理問所官改通政僉院歷和寧路
總管改汴梁先是朝廷令民自實田土有司繩以峻法
民多虛報以塞命其後差稅無所於徵民多逃竄流移
者塔爾海以其弊言於朝由是省民間虛糧二十二萬
民賴以安後改任廬州時有飛蝗北來民患之塔爾海
禱於天蝗乃引去亦有墮水死者人皆以為異民乏食

開廩減直俾民糴之所活甚衆天曆元年冬十月樞密
僉院奏以塔爾海充樞密僉院守潼關及河中府帝遣
人馳賜白金鈔幣宣授僉書樞密院事未幾西軍犯南
陽督諸衛兵往平之至其地首率勇士與特默格等戰
摧其前鋒將奪其旗鼓西軍敗走賜三珠虎符進大都
督累官資善大夫

安扎爾

安扎爾托卜氏嘗扈從太祖南征歲丙子復從定諸部

有功命領蒙古軍為前鋒時穆呼哩暨博爾濟為左右
萬戶長各以其屬為翊衛太祖命穆呼哩為太師國王
都行省承制行事兵臨燕遼營青齊魯趙韓魏皆下歲
已卯河中府降兵北還以安扎爾領前鋒總帥仍統所
部兵屯平陽以備金攝國王事時金將赫舍哩氏擁兵
數為邊患然畏安扎爾威名不敢輕犯其境歲壬午元
帥石天應守河中府屯中條山金侯將軍率昆弟兵十餘
萬夜襲河中天應遣偏裨吳權府率五百兵出東門伏

兩谷間諭之曰俟其半過即翼擊之俾腹背受敵即成禽矣吳醉敵至聲援弗繼城遂陷天應死焉遂燔其城屠其民將趨中條安扎爾進兵擊之斬首數萬級逃免者僅十數歲癸未春至聞喜縣西下馬村穆呼哩卒詔以子博囉襲其爵時平陽重地令安扎爾居守歲庚寅博囉由雲中圍絳州金將武仙恐退保潞東十餘里原上博囉馳至沁南未立鼓赫舍哩引兵襲其後博囉戰失利輜重人口皆陷沒安扎爾妻訥迪氏亦被獲拘於

大梁金主聞安扎爾威名名訥迪氏見訥迪氏色莊言

正不為動金主因謂之曰今縱爾還能偕爾夫來當厚
賞爾訥迪氏佯諾之遂得還太宗聞而義之召見褒賚
甚厚遂詔預其夫前鋒事帝率從弟昂吉濟達昆布哈
大王皇弟四太子暨國王博囉征潞州鳳翔至鈞州三
峯山金將完顏哈達引兵十五萬來戰俘其同僉伊喇
布哈等悉誅之明年壬辰春三月帝班師北還命偕都
元帥蘇布特圍汴城中識安扎爾旗幟懼曰其妻猶勇

且義況其夫乎歲甲午金亡詔封功臣賜平陽戶六百一十有四驅戶三十獵戶四未幾以疾卒子莽哈楚齊格爾至元十五年莽哈為管軍千戶二十四年從征納延二十六年從征海都二十七年宣授蒙古侍衛親軍千戶佩金符元貞元年有旨命領特默齊軍偕赫伯元帥從宗王徹伯爾西征改授昭信校尉右都威衛千戶大德元年召還至大四年卒子奈曼襲珠勒齊格爾入宿衛從世祖征鄂漢以功賜白金至元三年從征李璫

戰死之子庫庫楚為御史臺都事至元三十一年國王
蘇肯徹爾之子實迪既沒其家有故璽王將鬻之命庫
庫楚以示中丞崔或御史楊桓辯其文曰受命于天既
壽永昌蓋秦璽也或請獻之徽仁裕聖皇后后以鈔二
千五百貫賜實迪家金織文段二賜庫庫楚成宗即位
近臣以其事聞授庫庫楚漢中廉訪僉事仕至湖南廉
訪使

烏木罕

烏木罕蒙古巴喇呼岱氏與父布格齊俱事太祖征伐有功帝嘗問攻城畧地兵仗何先對曰攻城以砲石為先力重而能及遠故也帝悅即命為砲手歲甲戌太師國王穆呼哩南伐帝諭之曰烏木罕言攻城用砲之策甚善汝能任之何城不破即授金符使為隨路砲手達嚕噶齊烏木罕選五百餘人教習之後定諸國多賴其力太宗即位留為近侍以講武藝歲壬辰從攻河南有功壬子憲宗特授虎符陞都元帥癸丑從宗王錫里庫

征拉里西番實奇山桃里寺河西諸部悉下之卒子圖們岱爾以從戰功授金符襲砲手總管至元十年修立正陽東西二城置砲二百餘座與宋人戰却之十三年從丞相巴延伐宋駐軍臨安之臯亭山同益古岱等八人率甲三百入宋宮取傳國寶宋太后請解兵延見內殿期明日奉寶乞降至期果遣賈餘慶等奉寶至軍前以功授行省斷事官復令其子呼圖克岱爾襲砲手總管十四年進昭勇大將軍砲手萬戶佩元降虎符鎮平

江之常熟有叛民擁衆自號太尉者行省會諸軍討之
與呼圖克岱爾父子自為一軍奮戈陷陣斬賊首戴太
尉擒朱太尉帝嘉其功十五年兼平江路達魯噶齊尋
遷徽州湖州卒呼圖克岱爾後陞砲手萬戶改授達魯
噶齊卒

錫琳甘布

錫琳甘布唐古人錫琳氏甘布亦云甘卜音相近而互
用也太祖時西夏既臣服大軍西征復懷貳心帝聞之

旋師致討命甘布同呼圖克特穆爾招諭沙州州將偽降以牛酒犒師而設伏兵以待之首帥至伏發馬躐甘布以所乘馬與首帥使奔自乘所躐馬而殿後擊敗之他日帝聞曰卿臨死地而易馬與人何也甘布對曰小臣陣死不足重輕首帥乃陛下器使宿將不可失也帝以為忠進兵圍肅州守者乃甘布之兄懼城破害及其家先以為請帝怒城久不下有旨盡屠之惟聽甘布求其親族家人於死所於是得免死者百有六戶歸其田

業歲乙未定宗憲宗皆以親王與蘇布特征西域明年
啓行甘布亦在行中又明年至袞騰吉斯海甘布從諸
王巴圖征俄羅斯至額里齊城大戰七日拔之己亥冬
十有一月至烏蘇木奇城負固久不下明年春正月甘
布率敢死士十人躡雲梯先登俘十一人大呼曰城破
矣衆蟻附而上遂拔之賜西馬西錦錫名巴圖爾明年
班師授甘布千戶賜濟遜為四時宴服尋遷斷事官丙
午定宗即位進秩大名路達嚕噶齊憲宗以布扎爾來

蒞行臺命甘布同署既又別錫虎符出監大名己未世
祖南征供給軍餉未嘗乏絕以疾興歸卒於家年六十
九子愛魯克

愛魯克襲為大名路達嚕噶齊至元五年從雲南征金
齒諸部蠻兵萬人絕縹緲道擊之斬首千餘級諸部震
服六年再入定其租賦平火不麻等二十四砦得七馴
象以還七年改中慶路達嚕噶齊兼管爨楚軍十年平
章賽音諤德齊行省雲南令愛魯克疆理永昌增田為

多十一年閱中慶版籍得隱戶萬餘以四千戶即其地屯田十三年詔開烏蒙道帥師至玉連等州所過城砦未附者盡擊下之水陸皆置驛傳由是大為蹇音諤德齊信任十四年忙部也可不薛叛以兵二千討平之遷廣南西道左右兩江宣撫使兼招討使十六年遷雲南諸路宣慰使副都元帥十七年復立雲南行省拜參知政事十八年烏蒙羅佐山白水江蠻殺萬戶阿古以叛復討平之十九年召詣闕進左丞也可不薛復叛詔與

西川都元帥伊蘇岱爾湖南行書托里齊會師進討禽

也可不薛送京師仁普諸酋長皆降得戶四千諸王桑

科爾帥諸將征緬愛魯克供餽無乏絕二十二年烏

蒙阿謀殺宣撫使以叛與右丞拜達勒往征之拜達勒

以愛魯克習知其山川道里令諸軍悉聽指授分道進

學生擒阿蒙以歸二十四年進右丞朝廷立尚書省復

改行尚書右丞鎮南王征交趾詔愛魯克將兵六千人

從之自羅羅至交趾境交趾將昭文王以兵四萬守木

兀門愛魯克與戰破之擒其將黎石何英比三月大小一十八戰乃至其王城與諸軍會戰又二十餘合功為多二十五年感瘴癘卒贈平章政事諡毅敏子嘉琿中書平章政事請於朝贈其祖錫琳甘布太師諡貞獻加贈愛魯克太師追封魏國公改諡忠節

綽爾濟都勒幹

綽爾濟都勒幹蒙古克埒氏初以其部人二百從太祖征奈曼西夏有功命將萬人為太師國王穆呼哩前鋒

下金桓州得其監馬幾百萬匹分屬諸軍軍勢大振歲
辛未破遼東西諸州唯東京未下獲金史遣往諭之綽
爾濟都勒斡曰東京金舊都備嚴而守固攻之未易下以
計破之可也請易服與其使偕往說之彼將不疑俟其
門開繼以大軍赴之則可克矣卒如其計徇地河北攻
大名小大數十戰城垂陷中流矢而卒武宗時贈太傅
追封衛國公諡武敏子薩奇森布哈嗣將其軍太宗元
年己丑錫金符安輯河北山東諸州先是真定同知武

仙攻滅都元帥史天倪家其弟天澤擊仙走復真定以
天澤為真定河間濟南東平大名五路萬戶庚寅命薩
竒森布哈佩金虎符以總師行省監其軍金宣宗之徙
都於汴也立河平軍於新衛以自固恃為北門薩竒森
布哈數攻之不拔壬辰正月太宗自白坡濟河而南睿
宗由峭石灘涉漢而北薩竒森布哈集西都水之舟渡
自河陰至鄭鄭守馬伯竒降及金哀宗勢力窮蹙出奔
帝命薩竒森布哈追躡之會其節度薩尼雅布棄衛入

汴薩奇森布哈遂據而有之十二月哀宗自黃陵岡濟
河謀復衛薩奇森布哈與其將拜駐戰白公廟五日夜
俘斬萬計餘衆盡潰哀宗竄歸德薩奇森布哈追躡其
後薄北門而軍左右皆水其舟師日至癸巳四月其將
官努夜來斫營腹背受敵薩奇森布哈與一軍皆沒嗣
國王塔斯承制以其弟明安岱爾領其行營尋有旨以
為蒙古漢軍萬戶明安岱爾善騎射從征淮安因糧於
敵未嘗匱乏軍士免負擔之勞咸樂為用癸丑憲宗遣

從寶勒們太子南伐死於釣州五子長都呼幼布呼齊
都呼從世祖北征叛王挺戈出入其陣帝壯之賜號巴
圖爾賞白金四百五十兩及平李璫之亂亦有戰功布
呼齊光祿大夫徽政使金亡命大臣呼圖克料民分封
功臣薩奇森布哈妻楊氏自陳曰吾舅及夫皆死國事
而獨爾見遺事聞帝曰彼家再世死難宜賜新衛民二
百戶薩奇森布哈贈太師諡忠武明安岱爾贈太保諡
武毅爵皆衛國公

實喇濟蘇

實喇濟蘇幼從太祖征回回河西諸國俱有戰功太宗時從睿宗西征師次京兆府會伊埒哈達率諸部兵作亂實喇濟蘇挺身斫賊陣下馬搏戰賊衆莫不披靡俄失所乘馬步走至睿宗軍中賊退睿宗嘉其勤勞妻以侍女薩古台世祖尤愛之軍旅田獵未嘗不在左右初實喇濟蘇之妻為皇子乳母於是皇太后待以家人之禮得同飲白馬漣時朝廷舊典白馬漣非宗戚貴胄不

得飲也實喇濟蘇子達春為博囉齊德濟鄂爾多千戶
達春子遷嘉努色埒默遷嘉努從征納延力戰而死帝
命籍納延人口財物以賜之色埒默年十六從世祖討
額呼布格戰於實默圖有功賜號巴圖爾賞賚尤厚授
光祿少卿仍襲為德濟鄂爾多千戶改同僉宣徽院進
僉院事以管軍千戶從征納延有功賞金蓋二金五十
兩復入為同知宣徽院事成宗時拜宣徽使加大司徒
卒子特們德爾襲為德濟鄂爾多千戶累遷宣徽院使

遙授左丞相

哈蘇納

哈蘇納奇雅喇氏太祖時從征王汗有功命同飲班珠爾河之水且曰與我共飲此水者世為我用後管領諤爾根軍從太祖征西域下賽瑪爾堪布哈爾等城至太宗時仍命領諤爾根軍併回回人匠三千戶駐於尋麻林尋授平陽太原兩路達魯噶齊兼管諸色人匠後以疾卒子訥古伯襲從憲宗攻釣魚山有功以疾卒子薩

題勒密實襲薩題勒密實卒子茂巴爾襲充桂齊千戶
遷西域親軍副都指揮使大德元年卒弟圖們岱爾襲
圖們岱爾卒子哈喇章襲

元史卷一百二十二

元史卷一百二十二考證

巴哩珠阿勒坦德濟 原文作巴而木阿而忒的斤考
哈喇噶齊必噶傳作八兒出阿而忒則木字乃术字
之訛然哈喇噶齊必噶傳內刪省的斤二字亦未合
今仍以全名改對

乃告諸伊羅勒德濟曰 伊羅勒德濟上文作玉倫的
斤此但稱的斤考伊羅勒德濟之子孫命名均有的
斤二字不書全名則混而無別今仍以全名改對

特默齊傳迎烏蘭哈達於鄂州 鄂原文作岳考烏蘭
哈達傳自鄂州之澣黃州北渡與大軍合蓋鄂州於
長沙為近此云烏蘭哈達由廣西至長沙則其為鄂
州無疑且地理志載岳州於至元十二年歸附此時
世祖方為皇弟烏蘭哈達何由得岳州而駐之今據
改

呼圖克特穆爾傳二十一年 按上文既書二十二年
此復出二十二年史文不應顛倒若此考皇子托歡

征交趾最久本紀至元二十三年遣能臣將蒙古軍
赴交趾助皇子托歡或即是呼圖克特穆爾然未可
臆改仍闕疑

奏伐交趾造船五百於廣東 按湖廣行省奏造船
事本紀載在至元二十三年此傳上文既載二十八
年又云居再歲則是至元三十年矣是時陳日烜久
已歸朝何用造船聲討自當以紀為正

塔爾海傳帝命充博囉齊 原文作寶兒赤係官名他

卷又作博兒赤博而赤今併改

安扎爾傳金侯將軍 按侯將軍續通鑑作侯小叔為

元帥右都監即其人也此未詳其名侯又譌侯今據
改

雪不台傳 原刻本列此傳於安扎爾之後 按此與

卷一百二十之蘇布特傳原文作速不台者詳略不
同而事實則一係重出今刪

綽爾濟都勒幹傳壬辰正月 原文訛壬申據本紀改

哀宗竄歸德 原文作義宗係從宇文虛中大金國志
之稱然金史及續通鑑皆作哀宗廟號不當歧出今
改正後倣此



欽定四庫全書薈要卷六千五百二 史部

元史卷一百二十三

明翰林學士亞中大夫知制誥兼修國史宋濂等修

列傳第十

布扎爾

布扎爾蒙古多托爾台氏父諾爾節身長八尺有勇力
善騎射能造弓矢嘗道逢太祖前驅騎士拜諾延邀與
俱見太祖視其所挾弓矢甚佳問誰為造者對曰臣自

為之適有野鳧翔於前射之獲其二并以二矢獻而退

拜諾延隨之至所居布扎爾出見拜諾延奇之許妻以

女父子遂俱事太祖嘗從征討賜諾爾節巴圖爾名從

征回回俄羅斯等國每臨陣布扎爾奮身力戰身中數

矢太祖親視之令人拔其矢血流滿體悶仆幾絕太祖

命取一牛剖其腹納布扎爾於牛腹浸熱血中移時遂

甦諾爾節卒憲宗以布扎爾為大都行天下諸路伊克

扎爾古齊印造寶鈔賜七寶金帶燕衣十襲又賜蔚州

定安為食邑布扎爾卒有子四人長好禮事世祖備宿
衛會丞相巴延伐宋奏好禮督水軍攻襄樊從渡江入
臨安以功授昭毅大將軍水軍翼萬戶府達嚕噶齊拜
特穆爾吏部尚書巴爾塔斯雲南宣慰使布呀齊襲父
職為水軍翼萬戶招討使鎮守江陰移通州伊魯謬勒
哲布哈遼陽省理問

扎拉台綽和爾

扎拉台綽和爾初事太祖時哈喇齊薩勒珠特都爾本

塔塔爾鴻吉哩伊奇喇斯等居堅河之濱呼蘭伊勒吉之地謀奉札木哈克為帝將不利於太祖綽和爾知之馳以告太祖以兵收哈里雅爾阿爾台伊拉袞之地盡誅札木哈克等惟鴻吉哩入降帝賜以達爾罕之名子納沁事世祖為伊克扎爾古齊納沁歿子巴克織襲巴克織卒子呼嚕古台襲致和元年八月執都爾蘇起軍之使察罕布哈并其金字圓牌以獻天曆元年十一月帝賜金帶仍復其職嘗奏言有犯法者治之當自貴人

始窮乏不給者救之當自下始如此則可得衆心矣其言良切於事弊云

庫庫布哈

庫庫布哈阿勒坦塔塔喇氏為人魁岸有膂力以善射知名歲庚寅太祖命太師穆呼哩伐金分特默齊為五部各置將一人庫庫布哈為五部前鋒都元帥所向莫能支然不嗜殺惟欲以威信懷附故所至無殘破略定濱棣諸州俘獲焦林諸處民四百餘但籍其姓名遣歸

鄉里徇益都守將降得其財物馬畜悉以分賜士卒歲
壬辰從太宗渡河攻汴梁歸德分兵渡淮攻壽州守將
無降意射書城中諭之城中人感泣以綵輿奉金公主
開門送款庫庫布哈下令軍中輒入城虜掠者死城中
帖然公主哀宗之姑也歲丙申太宗命五部將分鎮中
原庫庫布哈鎮益都濟南安扎爾鎮平陽太原博囉鎮
真定實訥台鎮大名齊哩克台鎮東平括民匠得七十
二萬戶以三千戶賜五部將庫庫布哈得分戶六百立

官治其賦得薦置長吏歲從官給其所得五戶絲以疾卒官子和托代領特默齊為元帥從丞相巴延取宋道死子托噶瑪勒襲其職累遷右都威衛千戶卒

巴延巴圖爾

巴延巴圖爾蒙古扎拉台氏幼事太祖賜名巴圖爾歲乙未太宗命領扎拉爾軍千六百人與塔爾海甘布征關西有功癸丑憲宗命與阿陶總帥汪德臣創立利州城甲寅領兵紫金山破宋軍鹿角寨奪其軍餉器械丁

已從都元帥耨埒城成都及領兵圍雲頂山下其城帝

親征元帥耨埒既進兵涉馬湖江留巴延巴圖爾鎮成

都降屬縣得其民悉撫安之賜黃金五十兩衣九襲諸

王哈坦納爾琿托克托等征大理還命巴延巴圖爾領

兵迎之道過新津寨遇宋潘都統戰敗之殺獲甚衆中

統二年元帥耨埒上其功授蒙古鄂囉官子鄂摩克台

孫烏袞察至元六年巴延巴圖爾告老烏袞察代其軍

從行省伊蘇岱爾征諸國有功十六年從大軍征鄂端

又有功賞銀五十兩二十一年諸王珠卜命烏袞察往喀什噶爾之地為遊擊軍時敵軍二千餘烏袞察以勇士五十人與戰擒其將額布根和卓以獻王壯之以其功聞賞銀六百兩鈔四千五百貫授蒙古軍萬戶賜三珠虎符三十年卒次子襲授察遜塔拉左副元帥尋卒弟塔海呼圖克襲陞鎮國上將軍都元帥改授四川蒙古副都萬戶至治二年以疾退子博囉特穆爾襲

額斯倫

額斯倫蒙古氏太祖時命同飲班珠爾河之水扈駕親
征有功命領兵收附遼東女直還賞金甲珠衣寶帶他
物稱是復命總兵征西夏與敵兵大戰於哈喇哈扎爾
之地西夏勢蹙其主懼乞降執之以獻太宗殺之賜以
所籍貨產繼領兵收附信安下金二十餘城其後告老
諸王塔齊爾命其子布哈代領其軍

舒庫爾

舒庫爾默爾吉濟特氏太祖時命同飲班珠爾河之水

扈從親征已而從破信安畧地河西賜金虎符授洺磁等路都達魯噶齊領軍出征復從伐金破河南太宗命領濟南大名信安等處軍馬復從國王達實出征歲辛亥卒子巴圖襲巴圖卒子呼圖克襲移睢州從世祖渡江攻鄂還鎮思州中統三年從征李璫有功尋命修立邳州城領兵鎮兩淮十一年從丞相巴延渡江有戰功又從叅政董文炳泆海出征還鎮嘉興行安撫事十二年加昭勇大將軍職如故十四年授嘉興路總管府達

噶齊尋陞鎮國上將軍黃州路宣慰使尋罷黃州宣慰司復舊任十六年改授浙西道宣慰使加招討使仍鎮國上將軍奉詔征占城以其國降表貢物入見帝嘉之厚加賞賚二十四年從征交趾明年還師授邳州萬戶府萬戶三十年沒於軍

阿喇勒烏蘇

阿喇勒烏蘇回鶻巴鄂爾氏仕其國為千夫長太祖征西域駐蹕巴鄂爾之地阿喇勒烏蘇率其部曲來降從

帝親征既破瀚海軍又攻輪臺高昌于闐塔實干等靡
戰不克沒於軍子喇卜丹從世祖北征有功至元二十
九年卒壽一百二歲子沙木斯鼎有子五人長烏瑪喇
陳州達魯噶齊次博貝隆鎮衛都指揮使次實都監察
御史次阿哈瑪特拱衛直司都指揮使次額森博貝驍
勇善騎射歷事成宗武宗仁宗數被寵遇計前後所賜
楮幣餘四十萬緡他物稱是積官榮祿大夫佩三珠虎
符子阿都瑪勒襲職致和元年八月自上都逃來丞相

雅克特穆爾任為裨將率壯士百人圍穆爾特穆爾等
於托囉克台驛擒之以獻特賜衣一襲及托克托默色
甲金束帶各一白金一百兩鈔二百錠天歷元年九月
充行院同僉十月從擊呼喇台滿濟勒噶等軍於盧溝
橋敗之追至紫荆關多所俘獲招降安圖所將軍一千
五百人復以功受上賞二年進樞僉院三年以隆鎮衛
都指揮使兼領拱衛司

綽爾

綽爾伯索氏世居汴梁陽武縣從太祖收附諸國有功
又從征金沒於陣子綽哈從征河南山東復沒於陣子
必圖將其父軍從攻鄂州以功賞銀帛衣甲等繼從太
子和克齊西征大理國復沒於陣子阿巴齊至元五年
授武畧將軍蒙古千戶賜金符從圍襄樊復渡江奪陽
羅堡岸口以功賞白金進宣武將軍蒙古軍總管管領
左右翼兩萬戶軍既下廣德從平章阿爾哈雅征海外
國率死士鼓戰船進奪岸口擒勇士趙安等以功賞銀

帛十六年命管領蒙古侍衛軍以疾卒於軍

額卜甘布

額卜甘布唐古氏歲辛巳率衆歸太祖隸蒙古軍籍奉
旨同所管河西人從穆呼哩出征以疾卒子昂吉爾襲
領其軍征諸國有功至元六年授金符千戶從征蘄黃
安慶等處九年易虎符陞信陽萬戶從平章阿珠南征
又有功歷淮西道宣慰使叅知政事都元帥廬州蒙古
漢軍萬戶府達嚕噶齊行省左丞相尚書左丞積官龍

虎衛上將軍二十一年攜其子昂哈圖入見世祖命昂
哈圖充舒庫爾齊二十四年隨駕征納顏有功奉旨代
其父職二十六年授廬州蒙古漢軍萬戶府達魯噶齊
大德六年領兵討宋隆濟等以功受上賞還鎮廬州以
私財築室一百二十餘間以居軍士之貧者省臺以其
事聞特命陞其秩以金束帶賜之泰定四年卒昂哈圖
之弟鄂博由舒庫爾齊授金符唐古圖魯格千戶後改授
海北海南道廉訪使

趙阿克盤

趙阿克盤圖伯特烏斯藏多族氏始附宋賜姓趙氏世居臨洮祖巴莽富甲諸羌父阿克昌貌甚偉有力兼入金貞祐中以軍功至熙河節度使金亡保蓮花山以其衆來歸皇子奎騰之鎮西土也承制以阿克昌為壘州安撫使時兵興城無居人至則招逃亡立城壘課耕桑以安輯之年八十卒於官阿克盤事親以孝聞從伐蜀與宋都統制曹友聞屢戰勝負畧相當以破大安功最

授同知臨洮府事斬朝天關乘嘉陵江至閬州獲蜀船

三百艘攻利州生得其劉太尉戰敗宋師於潼川宋制

置使劉雄飛進攻青居山阿克盤擊之宵潰四川大震

進逼成都畧嘉定平峨眉太平寨擒其將陳侍郎田太

尉餘衆悉降大小五十餘戰皆先陷陣皇子賜以金甲

銀器歲壬子世祖以皇弟南征大理道出臨洮見兩竒

之命攝元帥城益昌時宋兵屯兩川堡柵相望矢石交

擊歷五年而城始完憲宗出蜀以阿克盤為選鋒攻西

安下之賜金符授臨洮府元帥帝駐釣魚山合州守將
王堅夜來斫營阿克盤率壯士逆戰手殺數十百人堅
遂引去明日陛見帝喜曰有臣如此朕復何憂賜黃金
五十兩名曰巴圖爾中統建元詔還鎮臨洮歲饑發私
廩賑貧乏給民農種粟二千餘石蕪菁子百石人賴不
飢郡當孔道傳置旁午有司敝於供給阿克盤以私馬
百疋充驛騎羊千口代民輸帝聞而嘉之詔京兆行省
酬其直阿克盤曰我豈以私惠而邀公賞耶卒不受以

軍事赴青居山道為宋兵所邀遂死於敵阿克盤好畜
良馬常千蹄歲擇其上驥五駟貢於朝子孫遵之不替
先是勲臣子孫為祖父請諡者帝每靳之至是勅大臣
以美諡諡之諡曰桓勇于重喜始給侍皇子奎騰為親
衛癸丑從世祖征哈刺章數有功中統元年瑛塔哈反
從總帥汪良臣引兵至巴克實河納古爾和斯地逆戰
以功授征行元帥四年從討呼圖克德濟沙卜珠岱等
克之哲伯特穆爾王承制使襲父職為元帥入覲賜金

虎符為臨洮府達魯噶齊時解軍職而轉民官者例納符有旨趙氏世世勤勞勿拘常例使終佩之重喜在郤勸農興學省刑敦教以善治聞請致仕不許詔其長子袞吹嘉勒襲為達魯噶齊陞重喜鞏昌二十四處宣慰使卒諡桓襄袞吹嘉勒性靖退辭官閑處二十餘年仁宗聞其名召不起子德壽雲南左丞

沙扎該

沙扎該薩木丹氏弱冠宿衛太祖帳下從征西域諸國

有功歲癸巳太宗命佩金虎符充益都行省軍民達嚕
噶齊從大帥達春破徐州擒金帥國用安丁酉以益都
為皇太子分土遷京兆行省都達嚕噶齊至懷值大疫
士卒困憊有旨以本部兵就鎮懷孟未幾代察罕總軍
河南尋復懷孟己亥同僚王榮潛畜異志欲殺沙扎該
伏甲繫之斷其兩足跟以帛緘沙扎該口置佛祠中沙
扎該妻實喇巴爾聞之率其衆攻榮家奪出之沙扎該
畏瘡從二子馳旁郡請兵討榮殺之朝廷遣使以榮妻

孥貨產賜沙扎該家且盡驅懷民萬餘口郭外將戮之沙扎該力爭曰為惡者止榮一人耳其民何罪若果盡誅徒守空城何為苟朝廷罪使者以不殺吾請以身當之使者還奏帝是其言民賴不死沙扎該給榮妻孥券放為民遂以其宅為官廨秋毫無所取郡人德之既入覲太宗以沙扎該先朝舊臣功績昭著賜第一區於和林尋以疾卒勅葬山陵之側皇慶初贈推忠宣力功臣金紫光祿大夫上柱國溫國公諡忠襄仍勅詞臣劉敬

中製文樹碑於懷以旌其功云子昂阿喇嗣

徹辰巴圖爾

徹辰巴圖爾欽察人初事太宗掌牧馬從攻鳳翔戰潼關皆有功後從大將蘇布特攻汴京金人列木柵於河南徹辰巴圖爾率死士往拔之賜良馬十匹師還金將高都尉率衆邀於中路徹辰巴圖爾迎擊斬其首以歸賜白金五十兩幣四匹從攻蔡州前鋒塔塔爾與金將戰金將捽其鬚徹辰巴圖爾進斫金將乃得脫蔡州破

金守將佩虎符立城上徹辰巴圖爾以鐵椎擊殺之取

虎符以獻帝深嘉其能命從皇子攻棗陽繼從宗王昆

布哈攻光州一日五戰光州下賜黃金五十兩白金酒

器一事馬三十匹時百戶阿巴齊自以臨陣不勇乞徹

辰巴圖爾自代遂陞百戶從攻滁州與宋兵大戰至暮

宋兵敗走西山徹辰巴圖爾與千戶呼遜追殺之歲已

未世祖伐宋募能先絕江者徹辰巴圖爾首應命率衆

逼南岸詔徹辰巴圖爾與托歡領兵百人同宋兵諭鄂

州使降抵城下鄂守將殺使者以軍來襲徹辰巴圖爾
與之遇奮擊大破之復賜黃金五十兩中統三年授蔡
州蒙古漢軍萬戶冬宋人犯西平徹辰巴圖爾逐北踰
淮獲其生口甚衆至元二年秋由安慶入廬州聞宋兵
至亟設伏於竹林擊殺之四年秋九月元帥阿珠軍襄
陽安陽灘宋兵據渡口徹辰巴圖爾擊破其衆五年從
阿珠圍襄陽擊奪宋將夏貴米舟阿珠入漢江以其有
戰功俾與扎拉引軍南畧俘獲八十人十年八月畧地

淮東十一年遣招鄂州十二年遣招滁州誅王安撫改武畧將軍管軍千戶五月伏兵大江北岸擊宋軍敗走之十三年復畧地淮東獲其總管二人以獻遷滁州總管府達嚕噶齊宋都統姜才率軍取糧高郵徹辰巴圖爾從史萬戶奪其馬及糧索二萬淮東平入朝十四年從討叛人珠爾噶岱於和囉海圖改宣武將軍滁州路總管府達嚕噶齊十七年率其子托歡及孫茂入見奏曰臣老矣幸主上憐之帝命以托歡為宣武將軍管軍

總管佩金符茂除為滁州路總管府達嚕噶齊其後托
歡以征倭功授明威將軍滁州萬戶府達嚕噶齊陞昭
勇大將軍征行軍萬戶府達嚕噶齊佩三珠虎符又以
征瓜哇功陞昭毅大將軍鎮守無為滁州萬戶府達嚕
噶齊次子索珠襲其職

奇奇爾

奇奇爾斡爾喀氏太宗七月南伐以千戶從庫騰攻安
豐壽州又從諸王塔齊爾率蒙古軍二千攻荆山破之

賜馬二匹與萬戶孛鼎爾台以兵守沂邳畧漣海又從元

帥輝圖攻襄陽卒子桑噶蘇襲職率本部兵從丞相阿

珠攻襄樊又從達春築正陽堡瀘軍乘艦來窺壁壘桑

噶蘇率征騎逆之夾淮水而軍射死者甚衆至元十一

年賜金符授武畧將軍明年從御史大夫博囉罕平漣

海秋九月從丞相巴延渡淮率兵一千騎攻淮安南門

破之又從元帥博囉罕築灣頭堡萬戶孛鼎爾台臥疾令

桑噶蘇權領蒙古女直漢人三萬戶夏五月宋揚州都

統姜才引兵來襲桑噶蘇率本部兵逆戰有功又從丞相阿珠襲制置使李庭芝及姜才於秦州皆殺之十四年加宣武將軍管軍總管十八年為蒙古侍衛親軍總管二十三年改千戶三十年陞蒙古侍衛親軍副指揮使司事易金虎符加顯武將軍子尼古爾台元貞元年為蒙古侍衛親軍百戶大德六年襲父職佩金虎符授宣武將軍延祐四年陞左翊蒙古侍衛親軍都指揮使仍所佩符進懷遠大將軍

塔本哲爾

塔本哲爾蘇爾嘉氏太宗時以招討使將兵出征破信安河南以功授金虎符征行萬戶歲甲寅以疾卒子塔齊爾襲職歲己未率兵渡江破十字寨命其子重喜從行重喜率先引弓射中敵兵又多殺獲既而與敵兵戰於洋隘口奪戰艦一流矢中左足勇氣愈倍時世祖駐蹕洋隘口北親勞之曰汝年幼能宣力如是深可嘉尚然繼今尤當勉之及塔齊爾卒以重喜襲職中統三年

從征李壇有功四年以兵鎮莒州至元二年奉旨初築
十字路城以備守禦重喜率兵南巡為游擊軍四年從
招布哈出征至泗州北古城時蔡千戶為敵兵所圍重
喜奮戰救而出之五年入覲帝嘉其功賜白金納竒寶
段及金鞍弓矢等十年修正陽城明年宋兵圍正陽從
戰敗之十二年從下連海諸城俄奉旨率五千人從出
征道過衡陽店與宋將李提轄等戰大敗之殺掠幾盡
遂駐兵瓜洲十三年夏六月宋都統姜才領諸軍來圍

城堡敗之秋七月從兵襲擊李庭芝等於泰州十四年
進昭勇大將軍婺州路總管府達嚕噶齊佩已降虎符
未幾卒子慶孫襲職初授宣武將軍管軍總管鎮守安
樂州十六年移成鎮江府十八年還鎮通州二十年進
明威將軍二十二年移鎮十字路二十四年領諸翼軍
鎮太湖教習水戰二十九年從征瓜哇陞昭勇大將軍
征行上萬戶將行有旨留之皇慶二年卒子布呀齊襲

齊都爾

齊都爾蒙古氏父鄂齊爾事太祖為博囉齊齊都爾從

太宗征欽察喀喇回回等部有功四年收河南關西諸路得民戶四萬餘以屬莊聖皇太后為脂粉絲線顏色戶八年建織染七局於涿州明年改涿州路以齊都爾為達嚕噶齊卒子哈拉珠襲佩虎符李璫叛世祖命領諸萬戶為監戰達嚕噶齊以討之有功授解萬戶翼監戰領軍遷益都路蒙古萬戶監戰密州沒於軍從子呼喇珠襲職授昭勇大將軍至元十一年攻宋六安軍有

功行中書省命領諸軍戰艦衝宋軍宋軍敗有旨褒賞
九月師次安慶呼喇珠及叅政董文炳領山東諸軍順
流東下至丁家洲遇宋臣夏貴孫虎臣等戰江中宋軍
大敗擒其將校三十七人軍五千餘船四十艘十二年
三月與宋軍戰朱金沙復有功七月復與宋軍戰焦山
江中時丞相阿珠等督戰呼喇珠與董文炳身冒矢石
泅流鏖戰八十餘里呼喇珠身被數傷裝創力戰遂勝
之九月宋臣張殿帥攻奪呂城倉丹陽縣呼喇珠與萬

戶輝圖往救生擒之十月下常州從丞相巴延畧蘇湖
秀州至長橋遇宋軍又敗之十三年正月師至杭州丞
相巴延命呼喇珠守浙江亭及宋北門五月揚州軍劫
楊子橋堡敗之六月敗真州軍七月追李庭芝至通海
口降揚州及高郵寶應真州滁州等城江南平加昭毅
大將軍職如故尋遷湖州路達嚕噶齊十四年進鎮國
上將軍淮東宣慰使已而屯守上都十五年授嘉議大
夫行御史臺中丞十九年進資善大夫福建行省左丞

黃華叛平之二十年授江淮行省左丞二十三年遷右丞三月進榮祿大夫江浙行省平章政事六月卒

伊埒默色

伊埒默色奈曼氏歲丁丑太宗命與斷事官呼圖克鼎爾同署戍戍又同額斯倫巴圖爾充達嚕噶齊破南宿州辛丑使宋議和從行者七十餘人伊埒默色語之曰吾與汝等奉命南下楚人多詐倘遇害當死焉毋辱君命已而馳抵淮上宋將以兵脅之曰爾命在我生死頃

刻間耳若能降官爵可立致不然必不汝貸伊埒默色
曰吾持節南來以通國好反誘我以不義有死而已言
辭慷慨不少屈宋將知其不可逼乃囚之長沙飛虎寨
三十六年而死世祖深悼之詔復其家以子呼圖克哈
斯為達爾罕日給糧食其家人呼圖克哈斯自陳曰臣
願為國效死為父雪耻帝嘉納之授以上均州監戰萬
戶十八年以招討使將兵征日本死於敵

尼古爾

尼古爾在憲宗朝與額哩頁諤蘇三十人來歸後從征
釣魚山討李壇皆有功子阿都齊世祖時圍襄陽下江
南敗實喇及征納延皆以功受賞後事成宗武宗為扎
薩固遜仁宗時厯官至左阿蘇衛千戶卒子嘉琿初為
舒庫爾齊繼襲父職必里克圖叛命往平之凱還賜衣
一襲天厯元年八月從丞相雅克特穆爾戰居庸北有
功九月進拱衛直都指揮使尋遷章佩卿子濟延布哈
事仁宗為舒庫爾齊英宗時為進酒博囉齊天厯元年

迎文宗於河南賜白金綵段命為伊勒都齊九月往居
庸闕料敵道逢二軍謂特默齊諸軍曰今北兵且至其
避之濟廷布哈恐搖衆心即拔所佩刀斬之授兵部郎
中招集阿蘇軍四百餘人十月進兵部尚書授雙珠虎
符領軍六百人迎敵通州會丞相雅克特穆爾至檀子
山與圖們岱爾戰敗之遷大司農丞

阿爾斯蘭

阿爾斯蘭阿蘇特氏初憲宗以兵圍阿爾斯蘭城阿爾

斯蘭偕其子額森展迎謁軍門帝賜手詔命專領阿蘇人

且留其軍之半餘悉還之伴鎮境內以額森展置左右

道遇實埒格叛軍額森展力戰死之帝遣使裹屍還葬

之阿爾斯蘭言於帝曰臣長子死不能為國効力今以

次子尼古爾獻之陛下願用之尼古爾至帝命從烏蘭

哈達征哈喇章有功烏蘭哈達賞以白金名馬從伐宋

中流矢而死子呼爾敦岱爾充管軍百戶世祖命從博

囉諾延使哈喇茂之地以疾卒子呼圖克特穆爾武宗

潛邸時從征海都以功賞白金至大元年授宣武將軍
左衛阿蘇親軍副都指揮使四年卒

哈瑪爾圖

哈瑪爾圖蘇頁氏憲宗時從攻釣魚山有功還又從親
王塔齊爾北征充千戶所都鎮撫從千戶托倫伐宋沒
於陣子察罕從塔齊爾攻樊城西門領揚州等處游擊
軍與宋兵戰有功至元十一年從呼圖克特穆爾攻江
陵東南城堡又從阿嚙罕敗宋兵於陽邏堡南阿嚙罕

選為本萬戶府副鎮撫十二年分隸托克托總管出廣
德游擊軍與宋兵戰敗之賜白金酒器又從攻獨松千
秋撥出等關及諸山寨其降民悉綏撫之賜白金一百
兩十三年中書省檄為瑞安縣達魯噶齊始至招集逃
移民十萬餘戶十四年陞忠顯校尉管軍總把併領新
附軍五百人從宣慰唐古特戰於司空山有功命以其
職兼都鎮撫俄選充侍衛親軍十六年授銀符忠武校
尉管軍總把二十四年賜金符授承信校尉蒙古衛軍

屯田千戶二十五年進武義將軍本所達魯噶齊二十七年陞左翼屯田萬戶府副萬戶大德五年卒子塔納襲

阿穆爾

阿穆爾巴圖喀喇氏從蘇布特諾延征欽察攻河西城收西關破河南從定宗畧地阿努皆有功又從四太子南伐克齊哩克昆阿都齊博克遜又從兵渡江攻鄂以疾卒於軍子伊蘇岱爾從討阿勒達爾琿塔哈征李壇

伐宋累功授管軍總把至元十四年從攻福建興化招古田等處民五千餘戶以功陞武畧將軍千戶賜金符又招手號新軍二千五百餘人陞宣武將軍總管賜虎符有旨征日本伊蘇岱爾願効力賜以弓矢進懷遠大將軍萬戶二十年授泰州萬戶府達魯噶齊二十三年遷昭勇大將軍欽察親軍都指揮使二十四年從征納延有功明年卒後贈金吾衛上將軍追封成武郡公諡

顯敏

187

187

187

元史卷一百二十三

元史卷一百二十三考證


布扎爾傳有子四人 按下文所載係五人四字當是
五字之訛但他書無可訂正仍闕疑

扎拉台綽和爾傳太祖遂以兵收哈哩雅爾之地 按
太祖紀作逆戰於哈里雅爾台和囉噶地名互異

巴延巴圖爾傳總帥汪德臣創立利州城 原文作汪
世顯按憲宗本紀立城乃德臣事德臣為世顯次子
今據改

齊都爾傳揚州軍劫揚子橋堡 原本作揚子橋僅二

字於文義難通考本卷塔本哲爾傳有駐兵瓜洲宋
都統姜才領諸軍來圍城堡之文又宋史姜才傳載
兵築長圍自揚子橋竟瓜洲東北欲以久困之即
子橋築堡之證蓋元人築堡於揚子橋而揚州軍
往劫之也今據改



總校官編修臣吳紹濂